

lis Gnovis

■ UDIN. Messe par furlan

A Udin, la Messe par furlan e ven cjantade sabide ai 17 di Fevrâr aes 5 e mieze sore sere, li de capele «de Puritàt», daprûf dal domo (cun Radio Spazio che le trasmet sul moment). Al compagnarà la celebrazion il Còr "Rose di mil" di Montenârs. Al cjantarà messe pre Tonin Cappellari.

■ UDIN. Cors pratics di lenghe e culture furlane

A son viertis lis iscrizions a la edizion 2024 dai Cors pratics di lenghe furlane, inmaneâts de Societât Filologjiche Furlane (projet finanziât de ARLeF - Agenzie Regionâl pe Lenghe Furlane). Lis lezions a tratan argomentis di grafie, gramatiche e imprescj linguistics informatics. Il cors di Udin - te sede de Societât Filologjiche in vie Manin 18 - al tacarà martars ai 27 di Fevrâr dal 2024 a 5.30 dopomisdì, al sarà di nivel principiantis e al larà indevant par 13 lezions, une volte par setemane. Il docent al sarà il dot. Flavio Vidoni. Par informazions e iscrizions, cjala sul sît internet <https://www.filologicafriulana.it/corsi-pratici-di-lingua-friulana/> o ben indreçâsi al Uffici Formazion de Filologjiche (tel. 0432 501598 int. 3 formazione@filologicafriulana.it).

■ UDIN. Un ricovar pai gjats lassâts di bessôi

Il projet par un ricovar pai gjats, te citât di Udin, al è za stât prontât, e lu si fasarà in curt tal teren de ex caserme "Piave" di vie Lumignà, se la Aministrazion regionâl lu financiarà come ch'al va - pal prin lot al è stât domandât un finanziament di 200 mil euros -, midiant la leç 20 dal 2012. Si trate di une leç che e proviôt contribuîts propit par fâ sù ricovars par animài. A Udin si son contadis almancul 176 coloniis di gjats che a son a passon e 2.500 besteutis in cjame a associazions e a privâts. Ore presint il comun di Udin nol dispon di une struture publiche che e puedi dâ un sotet almancul temporani a chescj felins, intant che lôr a fasin ce che ur comande il lôr istint: si moltiplichin. Se il projet al rivarà a lâ fint insom, chescj felins a podaran biadelore gjoldi di une sistemazion decorose.

■ VENÇON. Strichis pedonâls... su pal mûr



Si sa che tancj di lôr, cuant che a vuidin, si lassin tentâ dal sgrisul de velocitât ancje cuant che no varesin di fâlu, e cussì tancj comuns a àn pensât di cjatâ il mût par che lis machinis si intardin, metint des gombis tai puecj plui pericolôs, e parsore des strichis pedonâls, par permeti a chei che a àn di traviersâ la strade di podê fâlu cence riscjà la ghirbe. Cualchi volte ancje in maniere un pôc originâl, come a Vençon, dulà che gombis e strichis a finissin suntun muret e un cordul stradâl tor ator di un prât, cussì che se un al vûl traviersâ la strade, al va a finî in face al muret. Un conseîr comunâl al à segnalât il fat disint che si son spindûts bêçs par dibant, ma secont il sindic si è fat chel che si veve di fâ, metint gombis e strichis propit tal puest dulà che si voleve che il trafic si intardàs almancul un pôc.

Miercus 14	Miercus de cinise	Domenie 18	I Domenie di C.
Joibe 15	S. Faustin vescul	Lunis 19	S. Conrât eremite
Vinars 16	S.te Juliane vergjine	Martars 20	S. Zenobi martar
Sabide 17	S.ts Martars di C.	Il timp	Ancjemò timp variabil



Il soreli
Ai 14 al jeve aes 7.12 e al va a mont aes 17.31.



La lune
Ai 16 Prin cuart.

Il proverbi
Cui che al da al torne a cjapà.
Lis voris dal mès
Prime dal inizi de Vierte, pensait ce verduris coltà chest an, magari une o dôs che no vès mai vût tal vuestri ort.

1966, al nas il Moviment Friûl, "sindicât di ducj i furlans"

Al jere stât pre Checo Placerean a sostignî la nassite dal Moviment

Al jere stât pre Checo Placerean di Montenârs, intun intervent infogonât dai siei, fat in ocasion dal prin Congrès de Associazion "Int Furlane" a pene nassude tal Jugn dal 1963, a sostignî la legjitimitât di une sielte sociâl che e puartâ a interessâsi di politiche, parcè che al coventave formâ une robuste cussience de identitât coletive come fonde di une ideologie che e varès vût di vuidâ la azion politiche dal popul furlan. La sostanza di cheste propueste e meteve su di un plan gnûf ancje il dibatiment sul probleme de autonomie furlane, che al jere za stât dismot dal Moviment Popolâr pe Autonomie Furlane dal professôr D'Aronco (che par un pôc di timp a 'ndi fasarà part ancje il zovin Pasolini), nassût ai 2 di Zenâr dal 1947, e chest ancje par vie che la composizion de region frutine apene dispatussade no tignive cont des tradizionâls aspetativis di chel prin Moviment, vint metût adun dôs realtâts sintudis diferentis, tacantlis cuntune liniute: "Regjon Friûl-Vignesie Julie". In cheste suaze si confâs ancje la cuistion de Facoltât di Medisine - ancjemò no nassude in region - che par prin l'Ordin dai Miedis de Provincie di Udin, ai 7 di Otubar dal 1964, al veve domandât che e fos istituide a Udin, cjatant la ferme oposizion di ducj i partîts politics, che invezit si jerin dâts di fâ par che e fos metude sù a Triest. La cuistion e diventâ l'element centrâl des



Una manifestazion dal Moviment Friûl

L'intindiment dal Moviment Friûl al jere chel di meti i interès dal Friûl prime di dut e di tutelâju a ducj i nivei

rivendicazions autonomistichis, racueltis de bande di tantis associazions furlanis, che a pensarin ben di metisi adun intun moviment che al sapontàs no dome la istance de Facoltât di Medisine a Udin, ma plui in gjenarâl chê de autonomie dal Friûl: al nassè cussì il Moviment Friûl. Che di bot si listà a "Sindicât di ducj i furlans", che la sô fondazion si fasè ai 9 di Zenâr dal 1966, biel che il so at costitutif al fo firmât di dodis di lôr ai 15 di Zenâr tal studi dal nodâr Sameda de Marco. Prin President al fo il professôr Arturo Toso. L'intindiment dal Moviment al jere chel di meti i interès dal Friûl prime di dut e di tutelâju a ducj i nivei. Il Moviment si declarave apartitic e viert ancje a ducj chei che a fossin iscrîts a partîts o associazions, ma compatibii cui fins dal Moviment, e che si impegnassin a meti i interès dal Friûl al prin puest. Daspò di pôcs mès, cul entusiasim e

l'impegn di tancj di lôr, che a àn lassât une olme impuartante te nestre storie, il Moviment si misuravà cui tancj problemis che a pesavin su la schene di chel puar Friûl: de emigrazion aes servitûts militars, dal svilup economic al ricognossiment de lenghe furlane, de istituzion de Facoltât di Medisine ae tutele dal ambient, cjatant ancje te Mozion dal clericât furlan, firmade tal Autun dal 1967 da bande di 529 predis furlans, il so manifest politic. Che al diventâ ancje il program dal Moviment cuant che, daspò di vè cirût, ma par dibant, une spuinde dai partîts par che a cjapassin a cûr la "cuistion furlane" e che si metessin in vore par cjatâ lis soluzions che a coventavin, al decidè di trasformâsi in partît politic, partecipant aes elezions regionâls dal 1968, e cjapan ben 38.898 vòts e trê conseîrs regionâi, pronti a batisi a pro dal Fri ûl. Ma cheste e je une altre storie.

Roberto Iacovissi

Tradizions furlanis dal mès par cure di Mario Martinis

SANT VALENTIN

Taumaturc martirizât intal III secul, Sant Valentin al ven fiestezât ai 14 di fevrâr, cuant che la atmosfere e la temperature a parin gambiâ e puartâ la biele stagion. Cussì, la sô fieste no dome e propon lis funzions di purificazion des antighis celebrazions paianis fatis intal timp di passaç dal vecjo al gnûf cicli del nature, ma e à cjapât ancje une grande impuartance te tradizion populâr des zonis agrariis come la nestre, li che e je diventade suee dal calendari di mieze stagion par stazâ temperature, timp, jevâsi dal soreli e slungjâsi des zornadis. Il significât simbolic e il valôr apotropaic de fieste di Sant Valentin a mieç fevrâr al sta inte benedizion dal pan intorceât a forme di 8 (colaç) cun ducj i riferiments di benedizion e di purificazion che a vegnin daûr dal pan rituâl, ma ancje inte benedizion des clavutis e des piçulis crôs di arint o di stagn che secont la tradizion a vegnivin mitudis sul cerneli dai malâts di epilessie e des malatiis psicologjichis. La fieste di Sant



Valentin e veve ancje un sigûr riferiment meteorologic pe sô fuarte ambivalence climatiche, tipiche dal mès fevrâr metût al liminâr de primave. E propri parcè che viers la metât di fevrâr lis condizions atmosferichis par solit a fasin regjistrà une svolte al frêt dal unvier, fin de Ete di Mieç chest di al cjapà une funzion di nunzi dal disveâsi de nature e dunçe dal sflorî dai sintiments umans, in linie cui prins svoi dai uciei in amôr e cul trasmutâ dai cuadris de nature. Infîn, tai ultims tims ancje in Friûl a son stadis scuviertis lis formis tradizionâls peadis ae fieste dai inamorâts, biel che a Udin si davuelç ancjemò in di di vuê la tradizionâl fieste di vie Pratlûs, antic borc citadin li che e esist une glesie intitulade a Sant Valentin. E li in chê date a tornin a cjapà vite lis benedizions sacris dai colaçs e des clavutis, intant che dilunc la strade si fasin grancj fiestezaments, oramai peâts cuasi dal dut ai riclams de industrie dal regâl.